

տին եւ սաստկացուցեալ զմարտն մղեցին զնոսա յետս , մինչեւ ապաստանել նոցա 'ի պատնէշս բանակի իւրեանց : Սակայն նախադարձակ զօրք Լատինաց կալեալ էին զկեդրոն բանակին . 'ի հասանել դուժկանաց առ Սալահատին՝ աճապարեաց դառնալ յետս , զի մի փակեցնեն զճանապարհ իւր , և հասեալ անդ ցրուեաց զնոսա : Յայսմ արիւնահեղ պատերազմիս անկան բազումք յերկուց կողմանց , զազանք եւ թռչունք առանձին բանակ հարեալ էին 'ի դաշտի անդ , ասեն պատմիչք Արաբացոց : Եհաս ձմեռն , և Սուլթանն խօթացեալ մեկնեցաւ 'ի լեռոն Խուրուս , և Հիսամէտտին Եգիպտական զօրօք պահապան եկաց քաղաքին : Ի մեկնիլ և 'ի տեղի տալ աւուրց ձմեռայնոյ և 'ի հասանիլ եղանակի դարնան , եհաս Մելիք Ատիլ բազմութեամբ զօրաց յեգիպտոսէ , և այլ իշխանք ջոկատիւ իւրեանց , եւ Սուլթանն ապաքինեալ 'ի ցաւոց , էջ 'ի լեռնէ անտի :

Սակայն Լատինք առաւել եւս ամրացուցեալ էին զբանակն իւրեանց , մինչեւ երեւիլ առ քաղաքին այլ իմն նոր քաղաք : Եւ դարձեալ սկիզբն եղեւ մարտին . յարձակիլ Լատինաց 'ի վերայ Պողոմայիդայ , այլազգիք դիմէին 'ի վերայ բանակի եւ պատնշաց նոցին , և այս կրկնակի պաշարումն տեսեաց բովանդակ ամ մի , և դաշտն ասպարէզ մշտնջենաւոր մարտի : Սալահատին այրեաց զամբոթիւնս եւ զպատնէշս նոցա , եւ թէպէտ եցոյց քաջութիւն մեծ , այլ ոչ կարաց ազատել զբերդն , զի Լատինք գային և յաճախէին անդ եւ լնուին զթիւ անկեւոց : Լուր գալստեան կայսեր Ալմանիոյ առաւել դառնացոյց զսիրտ Սալահատինի , և արկ զնա 'ի տարակուսանս մեծ . վերստին դրեաց առ Խալիֆայն Պաղտատի և խնդրեաց օգնութիւն 'ի նմանէ . « Քրիստոնեայք , ասէ , առաւել են քան զալիս ծովու , առատ է սերմն քան զհունձն , որքան քշտեսցես զոսոս ծառոց այնքան շառաւիղս արձակէ , բանակ նոցա անմատչելի , զօրք մեր լքեալ և տարակուսեալ » . եւ այլ սոցին նման բանք երկար , այլ Սուլթանն չեղիտ 'ի նմանէ գոնէ բանս սիրօրանաց : Գրեաց առ կայսրն Յունաց և առ Սուլթանն Իկոնիոյ . զառաջինն չեզոքացոյց , և զերկրորդն առ իւր դաշնակից . զի սա և Սելճուգեանք առիթ լեալ էին